

आकाशवाणी जयपुर—अजमेर  
प्रादेशिक समाचार

- प्रदेश रा ऊगणी ज़िलां मांय भारी बारिश रो दौर जारी—जयपुर, बारां, बूंदी, धौलपुर, दौसा, करौली, कोटा अर सवाईमाधोपुर मांय घणी जोरदार बिरखा रो रेड अलर्ट जारी।
- मुख्यमंत्री घणी बिरखा रा हालात मांय जनता ऊं खास सावचेती राखण री अपील कीनी।
- हर घर तिरंगा अभियान रा तैत प्रदेश मांय न्यारा—न्यारा कार्यक्रम राख्यी ज्या।
- नशा मुक्त भारत अभियान रा तैत प्रदेशभर मांय शपथ लेवण रा कार्यक्रम राख्यी ज्या।

000

प्रदेश रा ऊगणी हलकां मांय आज ई मेह बरस्यो। लारला 24 घंटां मांय सब ऊं बत्ती 26 सेंटीमीटर बारिश दौसा ज़िला रा रामगढ़ पचवारा मांय व्ही। करौली ज़िला रा सपोटरा मांय 21 सेंटीमीटर, सवाईमाधोपुर अर लालसोट मांय 17—17, जयपुर मांय 13, अलवर रा कोटकासिम मांय 7, कोटा रा पीपलदा मांय 5, हनुमानगढ़ मांय 4 अर चूरू मांय 3 सेंटीमीटर पाणी बरस्यो। **भीलवाड़ा** शहर मांय आज दोपहरां री बगत तेज बिरखा व्ही। केकड़ी जिला मांय व्हे रही बिरखा ऊं छोटा—मोटा केई बंधा भर गया है, हालांकि बिरखा रे कारण नीचला हलकां मांय पाणी भर गयो अर आवण जावण मांय परेशानी व्ही। भरतपुर मांय रात ऊं सरू व्ही बिरखा आज ई चालती रही। पेश है म्हाणा खबरनवीस री रपट—

.....

मौसम केन्द्र जयपुर काल बारां, बूंदी, जयपुर, धौलपुर, दौसा, करौली, कोटा, सवाईमाधोपुर अर टोंक जिला मांय घणी जोरदार बिरखा रो रेड अलर्ट जारी कीनी है। अजमेर, अलवर, भीलवाड़ा, झालावाड़, झुन्झुनू अर सीकर मांय भारी बिरखा रो येलो अलर्ट जारी करी ज्यो है। महकमो जनता ने तळावां अर पाणी भरण री ठोड़ां कने नी जावण री राय दीनी है। मुख्यमंत्री भजनलाल शर्मा ई जनता ऊं सावचेती राखण री अपील कीनी है।

.....

आपदा राहत मंत्री किरोड़ी लाल मीणा रो काल हिण्डौन, गंगापुरसिटी अर सवाईमाधोपुर मांय व्हे रह्या जोरदार मेह रे कारण पाणी भर्योड़ा हलकां रो दौरा करण रो कार्यक्रम है। दूजी कानी पैली वाळा मुख्यमंत्री अशोक गहलोत तेज बारिश रे कारण उपज्या हालात माथे सोशल मीडिया हेंडल एक्स रे जरिये चिंता जताई है। ई बीचे घणी बिरखा वाळा जिला मांय बाढ़ नियंत्रण कक्ष माथे सावचेती बधा दीरीजी है अर एसडीआरएफ री टीमां ने अलर्ट राख्यी ज्यी है। सवाईमाधोपुर जिला रा मलारना डूंगर मांय ई जोरदार मेह बरस्यो। वठे दुर्गा सागर, राम सागर अर देलड़ा सागर तालाब माथे रपट चाल ग्यी है अर फलसावटा गांव रे चार ई मेर पाणी भर ग्यो है। मोरेल नदी मांय आ रह्या घणा पाणी रे कारण गंगापुर सिटी जावण वाळो गेलो बंद व्हे ग्यो है। सवाईमाधोपुर मांय आज संवारे व्ही जोरदार बिरखा रे कारण केई हलकां मांय पाणी भर ग्यो।

म्हाणा खबरनवीस बतायो के सवाईमाधोपुर ने मध्य प्रदेश ऊं जोड़बा वाळा गेला माथे कुशाली दरा कने जोरदार पाणी बहतो निजर आयो।

.....

मुख्यमंत्री भजन लाल शर्मा जयपुर मांय व्हे रही जोरदार बिरखा रे कारण उपज्या हालात रो जायजो लेवण सारू न्यारा—न्यारा हलकां रो दौरा कर रह्या है। करौली मांय व्हे रह्या जोरदार मेह ने ध्यान राखता थकां जिला रा प्रभारी सचिव आशुतोष ए.टी. पेडनेकर आज न्यारा—न्यारा हलकां रो दौरा कर र हालात रो जायजो लीनो। वे बिरखा रे कारण मुसीबत मांय पड्या लोगां सागे मुलाकात कर र हर संभव मदद रो भरोसो दिरायो। प्रभारी सचिव रसद विभाग रा अहलकारां ने खाण—पीण अर ईलाज रा जरूरी इंतजामात करण

बाबत कह्यो। जिला री सरकारी अर गैर सरकारी स्कूलां मांय ई आठवी कक्षा तांई रा विद्यार्थियां सारू काल छुट्टी रो ऐलाण कर दियो ज्यो है। जयपुर री संभागीय आयुक्त डॉ आरुषि मलिक शहर रा न्यारा—न्यारा हलकां रो दौरा कर र हालात रो जायजो लीनो अर अहलकारां ने ज़रूरी हुकम दीना। ई बीचे जयपुर कने कानोता बंधा मांय पांच जणां री मौत रा हादसा पाछे प्रशासन वठे जावण परां रोक लगा दीनी है। बंधा माथे फ़िलहाल चादर चाल रही है। ई बीचे जयपुर कने गलता कुण्ड मांय आज दो जणां री डूब जावण रे कारण मौत व्हे गयी। दूजी कानी शिक्षा विभाग जयपुर री सगळी सरकारी अर गैर सरकारी स्कूलां मांय विद्यार्थियां सारू काल ई छुट्टी रो ऐलाण कर दीनो है।

00000

राज्य मांय “हर घर तिरंगा” अभियान रा तैत न्यारा—न्यारा कार्यक्रम राख्या जा रह्या है। **झालावाड़** मांय स्कूली विद्यार्थी अर पुलिस वाळा देश भक्ति रा नारा लगाता थकां राजकीय खेल संकुल ऊं मिनी सचिवालय तांई तिरंगा रैली निकाळी। **बाडमेर** मांय गांधी चौक ऊं भगवान महावीर टाउन हॉल तांई तिरंगा रैली निकाळी ज्यी। **पाली** मांय स्वामी विवेकानन्द सर्कल ऊं जिला कलेक्ट्रेट तांई तिरंगा दौड़ अर स्केटिंग तिरंगा रैली निकाळी ज्यी। **अलवर** मांय जिला प्रशासन अर नगर निगम री ओर ऊं कंपनी बाग ऊं तिरंगा रैली निकाळी ज्यी। **पाली** मांय जिला कलेक्टर रा दफ्तर रा परिसर मांय खुद री फोटो खिंचण री ठौड़ बणायी ज्यी है। सांसद पी.पी. चौधरी, जिला कलेक्टर, एस.पी. अर पैली वाळा विधायक ज्ञानचंद पारख तिरंगो झंडो लहरा र फोटो खिंचवायो अर सगळा ऊं आप—आप रा घर तिरंगो झंडो फहरावण री अपील कीनी। **डूंगरपुर** जिला रा सीमलवाड़ा मांय ई खेल मैदान ऊं तिरंगा यात्रा निकाळी ज्यी। **बालोतरा** मांय स्कूली विद्यार्थी जागरूकता रैली निकाळी। **चूरू** मांय हर घर तिरंगा अभियान रा जिला उद्योग केन्द्र मांय हाथ री कारीगरी ऊं बणायी ज्या सामान री प्रदर्शनी लगायी ज्यी अर जनता ऊं देशी सामान काम लेवण री अपील करी ज्यी। **कोटा** मांय हर घर तिरंगा अभियान रा तहत आज दिव्यांग जन रैली निकाळी। **ब्यावर** मांय अजमेरी गेट ऊं जिला कलेक्ट्रेट तांई तिरंगा दौड़ राख्या ज्यी। ई मौके जिला कलेक्टर दौड़

मांय सिरकत करण वाळां ने नशो नी करण री प्रतिज्ञा दिरायी। **नागौर** मांय ई आज हर घर तिरंगा अभियान रा तहत जिला प्रशासन अर पुलिस री ओर ऊं तिरंगा यात्रा निकाळी ज्यी। **प्रतापगढ़** मांय सरकारी सीनियर सैकेण्डरी स्कूल री ओर ऊं तिरंगा रैली निकाळी ज्यी। **डूंगरपुर** मांय जिला प्रशासन अर पुलिस री ओर ऊं आज नया शहर ऊं कलेक्ट्री ताई तिरंगा रैली निकाळी ज्यी। **भीलवाड़ा** मांय प्रशासन री ओर ऊं 5 लाख तिरंगा झंडा मुफ्त बांट्या जावेला।

00000

केन्द्र सरकार न्यारा—न्यारा हलकां मांय चोखो काम करण वाळां ने स्वतंत्रता दिवस रे मौके नई दिल्ली मांय राख्या जावण वाळा स्वाधीनता दिवस समारोह सारु न्यौतो दे रही है। **डूंगरपुर** जिला रा राजेश यादव गेंजी ने ई न्यौतो मिल्यो है।

राजेश यादव नेहरू युवा केन्द्र रा पैली वाळा खुदसेवक है जो गांवाई हलका मांय सरकारी योजनावां रो घर—घर जार प्रचार कीनो।

.....

0000

केन्द्रीय सामाजिक न्याय अर अधिकारिता मंत्रालय री ओर ऊं आज नशा मुक्त भारत अभियान रा तैत नशा रे खिलाफ प्रतिज्ञा कार्यक्रम राख्यी ज्यो। ई रा तैत केन्द्रीय सामाजिक न्याय अर अधिकारिता मंत्री डॉ. वीरेंद्र कुमार नई दिल्ली मांय जनता ने शपथ दिरायी। केन्द्रीय मंत्री कह्यो के हाल ताई 11 करोड़ लोग ई अभियान ऊं जुड़ चुक्या है। साल 2020 मांय 15 अगस्त ने नशा मुक्त भारत अभियान सरु करी ज्यो हो। प्रदेश मांय ई नशा मुक्त भारत अभियान रा तैत आज न्यारी—न्यारी ठौड़ां कार्यक्रम राख्यी ज्यो। **डूंगरपुर** मांय सामाजिक न्याय अर अधिकारिता विभाग रा उप निदेशक कलेक्टर रा दफ़तर मांय अहलकारां ने नशो नी करण री सौगंध दिरायी। **शाहपुरा** मांय जिला कलेक्टर अहलकारां ने नशा मुक्ति री शपथ दिरायी। ई मौके **विकसित भारत का मंत्र, भारत हो नशो से स्वतंत्र** रा बारा मांय जाणकारी दीरीजी। **सांचौर** मांय जनता ने नशो नी करण री सौगंध दिरायी ज्यी। **केकड़ी** रा सरकारी कॉलेज मांय शपथ लेवण अर वाद विवाद होड़ रा कार्यक्रम राख्यी ज्यो।

000